



BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM

Komisija za ljudska prava, imigraciju, izbjeglice i azil

Broj: 01/5-01-14/02..

Sarajevo, 15.. januara 2002.

Z A P I S N I K

s 11.sjednice Komisije za ljudska prava, imigraciju, izbjeglice i azil,
održane 15. januara 2002. godine

Sjednica je počela s radom u 14,25 sati. Prisustvovali su: Osman Brka, Miloš Jovanović, Miro Grabovac, Omer Filipović, Bahrija Osmanović, Violeta Kamberović, Mustafa Cuplov i Muhamed Begović. Odsustvovao je Dušan Stokić.

Sjednici je prisustvovao Slobodan Nagradić, pomoćnik ministra za ljudska prava i izbjeglice.

Za sjednicu je usvojen sljedeći

D N E V N I R E D:

1. Razmatranje Prijedloga zakona o pravima nacionalnih manjina u Bosni i Hercegovini (predlagači poslanici HDZ Mariofil Ljubić, Miro Grabovac – Titan, Zdenko Vukić, Marko Amidžić i Mirko Baković);
2. Usvajanje Zapisnika sa 10. sjednice Komisije,
3. Usaglašavanje o Izvještaju o posjetama jednom broju opština i o prijedlogu zaključaka,
4. Tekuća pitanja.

Ad – 1: Razmatranje Prijedloga zakona o pravima nacionalnih manjina u Bosni i Hercegovini (predlagači poslanici HDZ Mariofil Ljubić, Miro Grabovac – Titan, Zdenko Vukić, Marko Amidžić i Mirko Baković)

Prije otvaranja rasprave Mustafa Cuplov je rekao da su poslanici dobili dva prijedloga zakona sa istom tematikom, pa je zapitao šta je sa Prijedlogom zakona o pravima nacionalnih manjina u BiH koji je predložilo Vijeće ministara 24. maja 2001. godine, te sa Prijedlogom zakona o pravima etničkih i nacionalnih zajednica koji je predložio Ibrahim Spahić 11.10.2001. godine.

Predsjedavajući Komisije Osman Brka upoznao je Komisiju da je Ustavno-pravna komisija na današnjoj sjednici potvrdila ustavnost i zakonitost Prijedloga zakona koji je podnijelo Vijeće ministara, a ranije i Prijedloga zakona predlagača poslanika HDZ-a Mariofila Ljubića i drugih. Ukratko je iznio razlike između ova dva prijedloga zakona, te, s obzirom da se radi o istoj temi, predložio je da poslanici HDZ-a i predstavnici Vijeća ministara pokušaju zajedno usaglasiti određena pitanja i doći do

kompromisnog prijedloga zakona. Izrazio je iznenađenje što se dešava da se podnose dva prijedloga o istoj tematici od pripadnika alijanske (Vijeće ministara i Ibrahim Spahić).

Violeta Kamberović naglasila je da je dobila amandmane Mirka Banjca koji su nečitki, te da zbog toga o njima ne može raspravljati niti odlučivati.

Mustafa Cuplov je naglasio da nije sporno što su poslanici HDZ-a podnijeli zakon, jer na to imaju poslovničko pravo, ali je naglasio da se razmatranje odvojeno jednog i drugog može doći u kontradiktornu situaciju. Predložio je da se pokuša doći do jednog kvalitetnog prijedloga.

Miro Grabovac – Titan, pored ostalog, rekao je da su poslanici HDZ-a izašli sa svojim prijedlogom kada je pao zakon Vijeća ministara, jer je zakon potrebno donijeti ogledajući se na sve evropske demokratske zemlje. Rekao je da oni nisu znali da li će i kada će Vijeće ministara predložiti zakon, te da nemaju ništa protiv da sjednu i razgovaraju da bi se ako je moguće usaglasio jedan zakonski prijedlog. Naglasio je da oba mogu ići u proceduru, a da nije protiv ni da se, ako bude moguće, sastave.

Slobodan Nagadić prvo je osporio navod da je prethodni zakon Vijeća ministara pao, rekavši da je on samo zaustavljen iz proceduralnih razloga, te je to obrazložio.

Što se tiče novopodnesenog prijedloga zakona o zaštiti prava nacionalnih manjina, koji je podnijelo Vijeće ministara, rekao je da misli da je on bolji i da je lakše provodiv, te da on stoji iza toga prijedloga zakona.

Predsjedavajući Komisije Osman Brka je konstatovao da su predstavnici i jednog i drugog prijedloga prihvatili sugestiju da pokušaju usaglasiti razlike i predložio da do iduće sjednice po mogućnosti izađu sa jednim usaglašenim prijedlogom.

U diskusiji su dalje učestvovali Muhamed Begović, Miro Grabovac, Bahrija Osmanović, Violeta Kamberović i Mustafa Cuplov. Mustafa Cuplov iznio je usmeno i konkretne primjedbe na pojedine članove, međutim, većina diskutiranih je sugerisala da se o Prijedlogu zakona i ne raspravlja odvojeno od prijedloga Vijeća ministara jer je neizvjestan konačan ishod. Svi su se zalagali da nije bitno koji će se prijedlog usvojiti već da je bitno da se dođe do kvalitetnog zakona.

Miro Grabovac se nije složio da se razmatranje prijedloga zakona koji su podnijeli poslanici HDZ-a odlaže, već da ovaj ide u proceduru, a da se, u međuvremenu, predlagači oba zakona sastanu i pokušaju postići kompromis.

Poslije diskusije predsjedavajući Brka je predložio da se ipak odgodi razmatranje i izjašnjavanje o Prijedlogu zakona poslanika HDZ-a.

Prijedlog je usvojen sa 7 glasova ZA i jednim protiv.

Ad – 2: Usvajanje Zapisnika sa 10. sjednice Komisije

Primjedbom na Zapisnik dao je Miloš Jovanović, da u dijelu gdje se govori o primjedbama na zaključke, nije korektno navedena njegova primjedba na zaključak broj 5., tj. da je on predložio da se u tom zaključku samo navede “da je neophodno obezbijediti multiteničku zaposlenost”, bez spominjanja 1991. godine.

Sa ovom primjedbom Zapisnik sa 10. sjednice Komisije usvojen je jednoglasno.

Ad – 3: Usaglašavanje o Izvještaju o posjetama jednom broju opština i o prijedlogu zaključaka,

Osman Brka napomenuo je na početku da se Komisija vraća sada ponovo na raspravu o prijedlogu zaključaka koji su na Komisiji bili usvojeni kao sastavni dio Izveštaja i podneseni Domu na usvajanje. Pored ostalog, rekao je da privhata da je g. Jovanović na Komisiji diskutovao ovako kako je rekao prilikom rasprave o Zapisniku. Međutim, rekao je da on u potpunosti ostaje kod zaključka broj 5. o kojem je na Domu bilo i najviše diskusije, kao i kod drugih zaključaka.

Miloš Jovanović je izrazio svoje protivljenje da se u zaključku broj 5. pominje 1991. godina, naglasivši da je od tada prošlo 11 godina i da su se mnoge stvari promijenile, te da to uopšte nije moguće realizovati u praksi.

U diskusiji su učestvovali Mustafa Cuplov, Omer Filipović, Bahrija Osmanović, Violeta Kamberović, Miro Grabovac, Osman Brka, Miloš Jovanović.

Miloš Jovanović je predložio da se o svakoj tački zaključaka Komisija izjasni ponaosob, jer on ima određene primjedbe i na još neke tačke, kao što je tačka 4, rekavši, pored ostalog, da on nema pravo da Budžetu Republike Strpske stvara dodatne obaveze.

Prihvaćen je prijedlog, te se Komisija izjasnila ponaosob o svakoj tački zaključaka od 1. do 8.

Jednoglasno su usvojene tačke 1, 2. 6. i 7. dok je 3, 4. 5. i 8. tačku predloženih zaključaka osporio Miloš Jovanović, pa su one usvojene sa 7 glasova ZA i jednim protiv.

Prema tome, Komisija je većinom glasova (7 ZA i 1 protiv) usvojila zaključke sadržane u Izvjetšaju Komisije o posjetama jednom broju opština u Bosni i Hercegovini.

Ad – 4: Organizacija okruglog stola na temu "Ljudska prava i Dejtonski mirovni sporazum"

Uvodno objašnjenje dao je predsjedavajući Komisije Osman Brka. Pored ostalog, rekao je da smo svi svjesni na kakvom su nivou ljudska prava na određenim prostorima Bosne i Hercegovine, te da on smatra da bi Komisija trebala da se angažuje na stvaranju ambijenta i poboljšanju poštovanja i obezbjeđivanja svih ljudskih prava na cijelom prostoru Bosne i Hercegovine. Rekao je da je o ovoj ideji ranije razgovarao pojedinačno sa svetrojciom članova Kolegija i da je od njih dobio načelnu podršku, ali da je izražen problem finansiranja, zbog čega je on o ovoj ideji razgovarao sa g. Naelom Džonsonom iz OSCE-a, te da će nastojati da pomogne da OSCE izfinansira odražavanje okruglog stola. Takođe je, pored ostalog, rekao da je razgovarao sa dosta eminentnih ljudi u Gradu i svi su prihvatili ideju.

Osman Brka predložio je da Komisija održavanje okruglog stola privhati kao svoju ideju, sa čime bi išla pred Kolegij, kako bi se zatražila podrška, kao i to da Predstavnički dom bude pokrovitelj okruglog stola koji bi se održao u Sarajevu. Na okrugli sto bi bili pozvani naučni i stručni radnici iz cijele Bosne i Hercegovine, kao i odgovorni ljudi iz međunarodne zajednice, među kojima i Badenter i Holbruk, koji je tvorac Dejtonskog sporazuma.

U diskusiji su učestvovali Muhamed Begović, Violeta Kamberović, Bahrija Osmanović, Mustafa Cuplov, Miro Grabovac i Miloš Jovanović.

U diskusiji je u principu podržana ideja održavanja okruglog stola, pogotovo ako bi OSCE obezbijedio finansiranje skupa. Predloženo je, ukoliko se dobije podrška Parlamenta, da se organizacija pokuša izdići iznad nivoa stranačke i bilo koje druge

pripadnosti. Takođe je predloženo da angažman domaćih stručnjaka uđe u proceduru razmatranja na Komisiji, s pretpostavkom da će se vjerovatno koristiti ljudi kojima je ovo profesionalno bliska tema i koji su se iskazali na ovom planu.

Poslije diskusije predsjedavajući je konstatovao da je Komisija jednoglasno prihvatila prijedlog da se organizuje okrugli sto i da se može zatražiti od Parlamenta da bude pokrovitelj, a da se finansiranje nađe iz drugih izvora. Zaključeno je da se od Kologija zatraži saglasnost za održavanje okruglog stola, kao i da Predstavnički dom bude pokrovitelj ovog skupa.

Ad – 5. Tekuća pitanja

— Violeta Kamberović postavila je pitanje šta je poduzeto sa zahtjevom Tukulj Devlete za pomoć u postupku vraćanja stana u Tešnju.

Dogovoreno je da se ovo provjeri.

— Osman Brka upoznao je prisutne da je Komisiji stigla predstavka od Helsinškog komiteta vezano za događanja u BiH – hapšenja i deportacije određene osobe, te je podsjetio da je on već nekoliko puta u vezi sa ovim problemom postavljao pitanja na Parlamentu, kao i da je od predsjedavajućeg Vijeća ministara tržio informacije, ali da nije dobio adekvatan odgovor. Za ovakvo kršenje ljudskih prava rekao je da smatra da bi ovo sutra trebalo na sjednici ponovo problematizovati, ili u ime Komisije ili kao pojedinac.

Zaključeno da predsjedavajući u ime Komisije problematizira ponovo ovaj problem i obavijesti Dom da je Komisija dobila predstavku.

Mustafa Cuplov je primijetio da je predstavka dostavljena na više adresa, te izrazio mišljenje da u dopisu postoji tehnička greška.

— Miloš Jovanović je upoznao Komisiju da je on postavio poslaničko pitanje koje se odnosi na to da je Visoki predstavnik imenovao članove Izborne komisije BiH, a što je trebalo da učini Predstavnički dom. Dobio je odgovor, ali mu nije jasno zašto je to učinio Visoki predstavnik, a da pitanje uopšte nije dolazilo na razmatranje u Domu. Postavio je pitanje kome će ta komisija podnijeti izvještaj npr. o izborima.

Poslije diskusije o ovom pitanju sugerisano je da Jovanović na sjednici Doma izrazi nezadovoljstvo odgovorom koji je dobio na poslaničko pitanje od Kologija i da Dom obavijesti da je o istom upoznao Komisiju za ljudska prava.

Miro Grabovac pokrenuo je inicijativu da Komisija organizuje posjetu svim optuženim državljanima Bosne i Hercegovine koji su pritvoreni u Hagu, radi uvida u njihovo stanje, da li se poštuju njihova ljudska prava i sve ostalo, što bi na neki način doprinijelo boljim odnosima između svih naroda u BiH.

Komisija je većinom glasova (6 ZA i 2 suzdržana) zaključila da se od Kologija zatraži saglasnost da delegacija Komisije za ljudska prava posjeti zatvorenike u Hagu.

Sjednica je završena u 16,30 sati.

SEKRETAR KOMISIJE

Rajka Stanišić

PREDSJEDAVAJUĆI KOMISIJE

Osman Brka